



GRUPO PROVINCIAL  
V-32244006  
xosebaltar@bng.gal

Bernardo Varela López, voceiro do grupo provincial do BNG; María Mangana Guede e Xosé Manuel Puga González deputados do grupo provincial do BNG na Deputación de Ourense, ao abeiro da Lei da Administración Local de Galiza e demais disposicións concordantes presenta a seguinte : **moción para a construción dun Instituto de Educación Secundaria en Barbadás.**

## EXPOSICIÓN DE MOTIVOS

O Concello de Barbadás é un dos concellos de Galiza que maior incremento poboacional tivo ao longo dos últimos 20 anos.

O concello contaba a 1 de xaneiro de 2022 con 11.201 persoas censadas. A esta cantidade habería que engadir unha bolsa de persoas que por motivos de arraigo cos seus concello de orixe non están censadas en Barbadás.

Conta (censo de 2022) con 401 nenos e nenas de 0 a 4 anos; 533 de 5 a 9 anos; 619 entre 10 e 14 anos; e 596 de 15 a 19 anos. É dicir: no entorno de 700 rapazas e rapaces en idade de escolarización en secundaria e bacharelato.

É Barbadás o único concello de máis de 10.000 habitantes en todo Galiza que non conta cun IES (Instituto de Educación Secundaria). Concellos de rango similar teñen 1 e mesmo 2 IES. E tamén moitos concellos con menos da metade de habitantes que Barbadás.

Certo é que concellos como Bande, Viana, Maceda.....é de boa lóxica que conten con IES para dar cobertura á súa área xeográfica (e seguramente moitos destes centros estean infradotados).

Pero tamén é certo que en determinadas áreas periurbanas das provincias de A Coruña e Pontevedra, concellos de menos de 10.000 habitantes contan tamén con IES (cousa que nos parece lóxica).

No mes de outubro de 2009 o entón Conselleiro de Educación, Jesús Vázquez, acompañado polo entón alcalde, José Manuel Freire Couto e boa parte do grupo de goberno,

fixo unha visita ao Concello no transcurso da cal, manifestou que o comezo das obras tería lugar ese mesmo ano, chegando a indicar que a primeira pedra sería posta no primeiro semestre de ese ano e mesmo que o centro comezaría a funcionar o seguinte curso.

No ano 2010 o mesmo conselleiro Jesús Vázquez anunciaba que Barbadás contaría nun futuro próximo cun novo instituto para secundaria e bacharelato.

A pesar de todos estes anuncios, o PP non executou ningunha actuación encamiñada á construción do instituto en Barbadás.

Unicamente nos anos da VII lexislatura do Parlamento de Galiza, contemplouse nos seus orzamentos unha partida adicada á realización do proxecto de construción do centro de ensino secundario en Barbadás.

Desde fai 25 anos o BNG leva demandando, tanto no concello de Barbadás como a través de diversas iniciativas no Parlamento de Galiza, a construción dun instituto no concello.

O argumento esgrimido pola Xunta de Galiza, inicialmente, sempre foi que o centro de referencia era o Ferro Couselo e que mentres houbera prazas libres, non tiña sentido facer un novo en Barbadás.

Xa no ano 2022, nunha visita que o conselleiro de Educación (D. Román Rodríguez) cursaba ás obras de ampliación do instituto Ferro Couselo, con un investimento próximo aos 3 millóns de euros. Nesta data o sr. Conselleiro dicía que era o concello de Barbadás o concello de toda Galiza que maior medre de nenas e nenos tiña, e isto serve de xustificación para acometer a ampliación do Ferro Couselo.

Curiosamente, nesas mesmas datas a consellería de Educación responsabilizaba ao concello de Barbadás de non poñer a disposición dela os terreos precisos para a súa construción.

Resulta evidente que a situación urbanística da parcela inicialmente proxectada para a construción do I.E.S. é, a día de hoxe, un dos principais atrancos para a construción da infraestrutura. Estamos diante dun área de reparto sen desenvolver e para o posta a disposición da Xunta de Galiza deberíase urbanizar a zona e dotar á parcela reservada para o IES dos equipamentos básicos que demanda á Xunta de Galiza, é dicir, conexións á rede de saneamento, abastecemento e subministro eléctrico.

Pero a Xunta de Galiza conta con instrumentos normativos para construción de estas infraestruturas básicas, tal e como establece a Lei1/2021 no seu artigo 40. E que é utilizado pola Xunta de Galiza para a posta en marcha de infraestruturas que están fora de planeamento urbanístico (como é o caso de Ourense).

A prestación de servizos básicos é unha obriga das administracións públicas, como o é que eses servizos sexan de calidade e acordes ás necesidades da veciñanza. O feito de non contar cun Instituto de Educación Secundaria dentro do propio municipio supón unha eiva que lastra e dificulta o asentamento de poboación a medio e longo prazo, e que pode mesmo chegar a xerar desarraigo na propia mocidade que ve como diariamente se ten que desprazar a un concello limítrofe, ao tempo que supón un custe engadido tanto para as familias como para as arcas do propio concello xa que actualmente este asume o custe do transporte ao IES Ferro Couselo, na cidade de Ourense e instituto de referencia para a mocidade barbadesa.

A Xunta de Galiza mantén unha actitude absolutamente pasiva ante a imperiosa necesidade desta infraestrutura.

A Lei 7/1985, reguladora das bases de réxime local, establece no seu artigo 36 que é competencia propia da Deputación Provincial a cooperación no fomento do desenvolvemento económico e social e na planificación no territorio provincial, de acordo coas competencias das demais administracións públicas

Por todo o anterior, o Grupo Provincial do BNG solicita ao Pleno da Corporación a adopción do seguinte:

#### **ACORDOS:**

- 1.- Esixir da Xunta de Galiza que nos orzamentos do ano 2025 figuren as partidas acaídas para acometer a realización do proxecto de construción do instituto de Barbadás.
- 2.- Tendo en conta que a maior parte do alumnado do IES Ferro Couselo reside no concello de Barbadás, que a Xunta de Galiza, programe novos usos públicos (de ser o caso) para este centro educativo.

Ourense, 12 de xuño de 2024

**Asdo: Bernardo Varela López**

**Voceiro do grupo provincial do BNG**

**A SR. PRESIDENTE DA DEPUTACIÓN DE OURENSE**